

06. juni 2017

Illoqarfiup najugaqarfigisap avataanut peqqissariartorluni nakorsiartup toqukkut qimagunnerani illoqarfigisaanut angerlaannerani ilaqutaasut atuligaannik qanoq iliorluni oqilisaasoqarsinnaanersoq pillugu apeqquteqaat aallaavigalugu Inatsisartut oqallinnisaannik siunner-suut.

(Inatsisartunut ilaasortaq Vivian Motzfeldt, Siumut)

Siumut sinnerlugu inatsisartuni ilaasortaq Vivian Motzfeldt, Siumut qutsavigissavara tamatsinnut ilaqutariittut arlaatigulluunniit qanigisatsinni peqqissariartortoqartillugu toqukkut qimagaanitsinni oqimaattorsiorluta misigisartakkatsinnut saqqummiussineranut.

Inuunitsinni qularnaatsumik atugassatta ilisimasatuatta ilagivaat, inunngorlutalu toqusussaagatta. Toqu aqutigalu qanigisaasut misigisaqartarput assigiinngissinnaasunik, apeqqutaalluni tassuuguinnartumik toqusoqarnerseq imaluunniit sivisuumik nappaatip atugarineratigut toqusoqarnerseq. Tassuuguinnartumik pilertortumilluunniit pisoqartillugu soorunami aamma tupaneeq, inuulluaqqusi-nngitsoornerlu aliasunnermut aamma sakkortusaatitut atugassanngortarmata.

Sivisuumik napparsimanerup kingorna toqujartuaarnermi qujanartumik Napparsimaveqarfik periarfissiisinnaasarpoq qanigisat ilagitinniarlugit illoqarfigisap napparsimavianut toqujartornissamut neqerooruteqarneq, tamannalu ullumikkut naammaginaratumik pisarsimanngippat Siumut isumaqar-poq tamanna anguniarlugu suliniutigineqartariaqartoq.

Pingaarteqarluinnarpormi qanigisat ingerlariaqqinnissaanut, pitsaasumik inuulluaqqusinissaq – tamannalu ajoraluartumik ullumikkut naammaginaratumik inuiaqatigiinni ilaatigut periarfissaaneq ajorpoq. Rigshospitalimiikkaanni imaluunniit Dronning Ingrid´p Peqqissaaviani, illoqarfik najugaqar-fik qimallugu pitsaanagerusumik qanigisanut inuulluaqqusinissamut periarfissiinissaq anguniarneqar-tariaqarpoq, pingaartumik meeraqaraanni nukangasunik. Meeqqammi angujoqqaaminik toqukkut qimagaasut siunissaat eqqarsaatigalugu, ingerlariaqqinnissaannut oqinnerpaamik atugassaqartitta-riaqarpagut – kissaatiginarpoq Peqqinnissaqarfiup tamanna ullumikkuminngaanniik qanoq pitsa-nngorsaavigisinnaanerlugu periusissiorfigissaat.

Ullumikkut inersimasut toqukkut qimagunneranni aningaasartuutit matuneqarnissaat pillugu assigii-nngitsutigut periarfissiisoqartarpoq. Atorfillit utoqqalinersiutillit assigisaallu kingorna qaammatini pingasuni aningaasarsiat ingerlaannarnissaannut periarfissiisoqartarpoq, aningaasartuutit matus-susernissaanut ilaatigut atorneqarsinnaasunik. Taamatuttaarlu taaneqarsinnaalluni S.I.K. Isuma-ginninnermi Aningaasaateqarfeqarmat, tassunga ilaatigut ilerrup angerlaanneqarnissaanut tapiis-sutinik qinnuteqartoqarsinnaalluni.

Naalackersuisut akissuteqaatiminni aamma eqqaavaat. Taamaattorli innuttaasut pisortanit ikiorser-neqarnissamik pisinnaatitaasut § 23 naapertorlugu ilisinnermut atatillugu toqusup qimataasa ani-ngaasartuutit matussusersinnaanngippatigit toqukkut qimaguttullu peqqussummi § 4, imm. 1-imi piumasaaqataasut naammassisimappagit naammaginaratumik annertussusilimmik pisortanit ikior-serneqarsinnaapput.

Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakker-suisoq ilisimatitsivoq Royal Arctic Linemut paasiniaasoqarsimasoq toqusut illerfiinik toqusut Najugarisaanut assartuinnermut akil pillugit. Royal Arctic Line ilisimatitsivoq illerfiinik zinkinik

Aalborgimiit Nuummut nassiussineq 1.600 kr. missaanik akeqartartoq. Najukkanut allanut assartuinnermi akit tamassuma missigissavaattaq akit kubikmeter aallaavigalugu naatsorsorneqartarmata.

Taamatut erseqqissaaneq soorunami aamma pitsaasuvoq kisianni aningaasartuutit annertuut ilagivaat zinkimik illerfissamik sanatitsineq aammalu ukioq naallugu illoqarfiit tamarmik tikinneqarsinnaaneq ajormata, Siumut isumaqarpoq pissutsit tamakkua annertunerusumik paasiniarlugit isummersuisoqarnissaa pisariaqartoq ilaatigut Illerfissarsiutileqatigiit ilagiit sinniisaalu peqatigalugit.

Siumut isumaqarpoq illoqarfitsik qimallugu peqqissariartortillutik toqukkut qimaguttoqarnerani, toqukkut qimaguttup timaata ilisaanissaanut siunissami aningaasartuutaasinnaasut sukumiisumik isummersuutigineqartariaqartut, tamannalu kissaatiginarpoq Pisortanik ikiorsiissutinut aaqqiissuuseqqinnermi ilanngullugu isummersorfigineqarnissaa.

Oqallisissiamut pingaarutilimmut tamatsinnullu attuisumut qujanaq, oqallilluarisi.

Martha Lund Olsen
Siumut